

惡人從游則日生邪情

### 宦傳

自古宦者亂人之國其源深于女禍崔胤爲相欲誅  
鋤宦官而召兵于梁梁兵至而宦者挾天子走之岐  
梁兵圍之三年昭宗旣出而唐亡矣

歐陽公五代  
史宦者傳

### 奄寺

奄止于上士抑其權也唐太宗詔內侍省不立三品  
官不任以事然內侍並列于六省開奄尹與政之階  
與周典統于冢宰異矣

### 宦隣

范純夫爲諫官東隣宦官陳衍園亭在焉衍每至園  
中不敢高聲謂其徒曰范諫議一言吾輩不知死所  
矣此所以爲純夫也王黼爲宰相與宦者梁師成隣  
居密開後戶往來徽宗幸黼第徘徊觀覽偶見之大  
不樂此所謂王黼也

### 人繫國

鄭用三良未可間衛多君子未有患季梁忠謀疆敵  
畏汲直守節亂萌弭詩曰無競維人四方其訓之正

先諫誅羸運促李雲忠隕漢宗覆章華僱僂陳業墮  
昭圖嬰阮唐鼎移詩曰曾事莫聽大命以傾

### 取人以身

曹志奏秀庾純父子皆切實之才晉武怒而不采郤  
詵阮种華譚直辯博之士則上第登庸斯取人以身  
之證乎

### 用人求實

王文正公凡於用人不以名譽必求其實張忠定公  
有清鑒善臧否人物凡所薦辟皆方廉恬退之士嘗  
曰彼驚名奔競者將自得之何假吾舉韓魏公屢薦  
歐陽公而仁宗不用他日復薦之曰韓愈唐之名士  
天下望以爲相而竟不用使愈爲之未必有補于唐  
而談者至今以爲謗歐陽脩今之韓愈也而陛下不  
用臣恐後之談者謗必及國不特臣輩而已陛下何  
惜不一試之以曉天下後世也上從之

### 周世臣

裳裳者華興賢者功臣之子孫世臣與國升降者也  
王朝則周召二公夾輔王室家父仍叔二雅舊人歷

汾王之亂平王之遷猶在也侯國則翼之九宗遂之  
四氏與封建之法相維持彼漢之或羣魏之荀何江  
左之 儉唐李之崔柳豈世臣之謂乎

### 古制稱所舉官爵

鼂錯對策首云平陽侯臣宙等所舉賢良方正太子  
家令臣錯自言所舉之人及其官爵無所隱漢志猶  
古也自後史無所紀唯唐張九齡對策首云嗣魯王  
道堅所舉道侔伊呂科行秘書省校書郎張九齡自  
糊名易書之法密不復見此矣道堅魯王靈夔之孫  
本傳稱其方嚴有禮法是以能舉九齡而秉史筆者  
不書於傳僅見九齡集

### 人用舊

詩曰老夫灌灌小子躑躑言老夫欲盡其謀而少者  
驕而不受也書曰黃髮之言則無所愆詩曰壽胥與  
試美用老人之言以安國也楚伍參曰晉之從政者  
新謂荀林父也士彌牟曰晉之從政者新謂范鞅也  
一以喪師一以失諸侯故人惟求舊

### 起復

宋仁宗嘗以故事起復富弼矣弼之辭曰何必遵故事以遂前代之非但當據禮經以行今日之是仁宗卒從其請孝宗嘗以故事起復劉珙矣珙之辭曰身在草土之中國無門庭之寇難冒金革之名以私利祿之實孝宗允其辭

大臣再入至五入

漢丞相再入二人周勃孔光御史大夫再入三人孔光何武王崇後漢太尉再入二人劉矩馬日禪三人一人胡廣司徒再入二人魯恭胡廣司空三人一人牟融唐宰相再入五十七人長孫無忌至裴樞三人十二人武承嗣至鄭畋四人三人韋巨源姚元之韋安石五入三人蕭瑀裴度崔胤

人重國

魯以季友治亂楚以子玉輕重魏以無忌折衝項以范增存亡

儲才

黃文毅公孔昭常曰國家用才猶農人積粟粟積于豐年乃可以濟饑才儲于平日乃可以濟事

持銓時言

舉士無方

灌夫爲人剛直士在已左愈貧賤尤益禮敬稠人廣衆薦寵下輩韓安國疎於財利所推舉皆廉士賢於已者也於梁舉壺遂臧固郅佗皆天下知名士元行冲謂狄仁傑曰下之事上如富家儲積以自資門下充爲味者多矣願以小人充備一藥石仁傑笑曰君正吾藥籠中物不可一日無

田得士

趙簡子出田鄭龍爲右有一野人簡子曰龍下射彼使無驚吾馬三命鄭龍不對簡子怒鄭龍曰昔吾先君伐衛免曹退爲踐土之盟不戮一人吾今一朝田而曰必爲我殺人是虎狼殺人故將救之簡子愀焉曰不愛其身以活人者可無從乎還車輟田曰人之田也得獸今吾田也得士

用林叔世廣平

鄭袤字林叔爲中郎散騎常侍會廣平太守缺宣帝謂袤曰賢叔大匠渾垂稱於平陽魏郡蒙化且盧子家王子邕繼踵此郡欲使世不乏賢故復相屈

晉書

鷲荐禰衡

鷲鳥累百不如一鷲使衡立朝必有可觀飛辯騁辭  
溢氣全涌解疑什結臨敵有餘如得龍躍天衢振翼  
雲漢揚聲紫微垂光虹蜺足以昭近署之多士增四  
門之穆穆

孔融荐禰衡

荀爽驟登台司

荀爽字慈明獻帝卽位董卓輔政徵爽爽欲遁吏持  
之急不得去因復就拜平原相行至宛陵復追爲光  
祿勳視事三日進拜司空爽自被徵命及登台司九

十五日

爲郎不遇

漢顏驕文帝時爲郎至武帝輦過郎署見驕龐眉皓  
髮上問叟何時爲郎何其老也答曰臣文帝時爲郎  
文帝好文而臣好武景帝好美而臣貌醜陛下卽位  
好少而臣已老是以三世不遇故老於郎署上感其  
言擢拜會稽都尉

戲車郎

衛綰以戲車爲郎鹽鐵論賢良曰戲車鼎躍咸出補

史累功積日或至卿相鼎躍東方朔所謂鼎官鄒陽所謂鼎士也

### 汰監司

昔范仲淹爲宰相凡不才監司一筆勾去富弼曰如一家哭何仲淹曰一家哭何如一路哭古今以爲名言

### 省官兵

唐太宗省內外之官定制七百三十員曰吾以此待天下之賢足矣古者天子六軍諸侯用兵不過三軍宋太祖定天下精兵不過二十萬十萬屯外郡十萬

### 屯京師

### 考課

漢時長吏不任位者三公遣掾吏案驗然後黜退其後不任三府而權歸刺舉之吏朱浮謂有罪者心不厭服無咎者坐被空文宋韓億爲執政每見天下諸路擡拾官吏小過輒不憚曰天下太平聖主之心雖草木昆蟲皆欲使之得所仕者大則望爲公卿次亦望爲侍從下亦望爲京朝官柰何錮之于聖世

### 吏治視上

紹興間李誼言漢循吏傳六人而五人出于宣帝酷吏傳十二人而八人出于武帝唐循吏傳十五人而出于武德正觀之時者半酷吏傳十二人而出于武后之時者亦半吏治視上之趨嚮

### 吏治

荀悅申鑒曰覩孺子之驅雞而見御民之術孺子之驅雞急則驚緩則滯馴則安許渾詩遯跡驅雞吏

### 益吏俸

宣紀神爵三年益吏百石以下俸什五通典引應邵

曰張敞蕭望之言倉廩實而知禮節衣食足而知榮辱今小吏俸率不足常有憂父母妻子之心雖欲潔身爲廉其勢不能可以什率增天下吏俸宣帝乃益天下吏俸什二與漢紀不同



翼  
學  
編

卷  
十  
一

臺灣國家圖書館, NATIONAL CENTRAL LIBRARY, TAIWAN. R.O.C.



翼學編卷之十一

廣漢朱應奎麗明父編  
豫章魏時應因是父校

治平集

商有上甲微

魯語展禽曰上甲微能帥契者也商人報焉孔叢子  
引書曰維高宗報上甲微蓋逸書也

周有不窋氏

周本記不窋末年夏氏政亂去稷不務不窋以失其

官而奔戎狄之間周語云不窋自窋于戎狄之間韋昭云不窋去夏而遷于豳詩正義按公劉避亂適豳公劉者不窋之孫

周替君臣

文王之詩曰文王孫子本支百世凡周之士不顯亦世此周所以興也宣王之後爲幽王斯干之祥黍離之萌也太師皇父之後爲皇父卿士尹吉甫之後爲尹氏太師厥父之後爲蹶維趣馬申伯之後爲申侯則與大戎滅宗周矣君臣皆弗克紹周焉得不替乎

吳有君臣

孫休之遣李衡有高帝之度其討孫琳有叔孫昭子之斷嚴峻之遜呂蒙有鄭子皮之風陸遜之薦淳于式有晉祈奚之風此吳所以興也

禾絹士師

誠齋爲章燾墓銘云今日士師非禾絹士師也宋明帝紀胡母顥專權奏無不可時人語曰禾絹閉眼諾胡母大張橐禾絹謂上也蓋謂秦檜顥政士師非主上之士師也

官制煩簡

有虞氏之官五十夏后官百殷官二百周官秦立百官漢因循不革自佐史至丞相十三萬三百八十五人

慎諫官

宋神宗將定官制謂蒲宗孟曰御史大夫非司馬光不可古人慎重諫官有如此者

秦用由余

晏元獻論秦穆公以由余爲賢用其謀伐戎夫臣節有死無二戎使由余觀秦終竭謀慮滅其舊疆豈鍾儀操南音樂毅不謀燕國之意哉秦穆之致由余而闢戎土也失君君臣臣之訓矣

獵遇太公

西伯將出獵卜之曰所獲非龍非虜非虎非熊所獲霸王之輔于是周西伯獵果遇太公

齊世家

爲相問三事

李昉爲相每見客必問三事民間有何疾苦爲政有何術業時政有何闕失知民疾苦則必惻然有拯援之心知爲政術業則曉然明其人之賢否知時政闕

失則時時有所更廢而民命國政人材皆自一問得之真宰相之度

### 相權

馮瀛王云吾三入相每不如前以擢任親故知之初入能用至丞郎再入能用至遺補三入不過州縣是宰輔之權日輕也桑維翰常謂交親曰凡居宰相職位有似着新鞋襪外望雖好其中甚不快活大抵宰相亦顧其人何如耳與其權重也寧輕

### 相度

李沆爲丞相秉政日狂生叩馬獻書歷試其短公遜謝曰俟歸詳覽生訕怒隨馬後肆言曰居大位而不能康濟天下又不能引退以謝人言久妨賢路寧無愧乎公于馬上踉蹌再三曰某屢求退奈上未允不敢去耳終無忤意富弼字彥國少有罵者如不聞人曰罵汝彥國曰恐罵他人又曰呼姓名而罵豈罵他人彥國曰天下無同姓名者乎告者大慙及爲相嘗語子孫曰恐之一字衆妙之門睦族處事尤爲先務若清儉之外更加一恐則何事不便

相延公議

司馬溫公作相日親書榜揭于客位曰訪及諸君若都朝政闕遺庶民疾苦欲進忠言者請以奏牘聞于朝廷光得與同僚商議擇可行者進呈取旨行之若但以私書寵喻終無所益若光身有過失欲賜規正卽以通封書簡分付吏人令傳入光得內自省訟佩服改行至于整會官職差遣理雪罪名凡干身計並請一面進狀光得與朝省衆官公議施行若在私第垂訪不核語及光再拜咨白

銓除

陳執中在中書不欲外聞差除每退朝卽閉省東門說者譏其不知相體李廸爲相丁謂擅權至除吏不以聞廸甚不平唐元宗疑吏部選試不公分爲十銓召入禁中決定尚書侍郎皆不得與吳兢表言陛下曲愛讒言不信有司非居上臨人推誠感物之道也

機密

荀攸深密有智防自從太祖征伐常謀暮帷幄時人及子弟莫知其所言攸姑子辛韜曾問攸說太祖取

冀州時事攸曰佐治爲表譚乞降王師自往平之吾何知焉自是韜及內外莫敢復問軍國事晏公殊旣以道德文章佐佑東宮真宗有所諮訪多以方寸小紙細書問之由是叅與機密有所對必以其藁進示不洩其後悉閱真宗閣中遺書得公所進藁類爲八十卷藏之禁中人莫之見也

相不任恩

宋李昉爲相有求進用者雖知其材可取必正色拒之已而擢用或不足用必和顏溫語待之子弟問故答曰用賢人主之事我若受其請是市私恩也若不  
用者旣失所望又無美辭此取怨之道也秦檜千鬼萬怪如不樂這人貶竄將去却與他慇懃不絕一日忽招胡和仲飯意極拳拳比其還家則臺章已下又送白金爲贖如欲論其人章疏多是自爲以授言者做得甚好傳安道諸公往往認得曰此秦老筆也

沂公眞宰相

王沂公當國未嘗顯拔一人范文正公乘間諷之曰明揚士類宰相之任也公盛德獨少此耳沂公曰司

諫不思耶恩若已出怨將誰歸文公惘然嘆曰真宰相也

### 大臣義不奉詔

唐河東節度使王鐔賂權近求兼宰相密詔中書門下曰鐔可兼宰相李藩遽取筆減宰相字署其左曰不可還奏之宰相權德輿失色曰有不可應別爲奏可以筆塗詔耶藩曰勢迫矣出今日便不可止旣而事得寢仁宗一夕遣使持手詔欲以劉氏爲貴妃李沆對使者引燭焚詔附奏曰但道臣沆以爲不可其議遂寢

### 相貴和

元祐諸賢不和是以爲紹聖小人所乘元符建中韓曾不和是以爲崇寧小人所陷紹興趙張不和是以爲秦氏所擠古之建官曰三公公則無私矣曰三孤孤則無朋矣無私無朋所以和也

### 小臣忠國

王時雍徐秉哲等爲賣國牙郎而不忍以宋宗族交與虜人者開封捉事使臣竇鑿也李鄴以越守降虜



而袖石擊虜偽守者親事官唐琦也

### 無官御史

大學古語云有髮頭陀寺無官御史臺言其清苦而  
顛亮也宋乾淳間竺舍質素飲器止陶瓦棟宇無設  
飾有頭陀風國有大事說論間發言侍從所不敢言  
攻臺諫所不敢攻如真御史然

### 諫諍

荀子述孔子之言曰昔萬乘之國有爭臣四人則封  
疆不削千乘之國有爭臣三人則社稷不危百乘之  
國有爭臣二人則宗廟不輟父有爭子不行無禮士  
有爭友不爲不義

### 弋諫

三王以弋道德五伯以弋戰國故秦魏燕趙者騏雁  
也齊魯韓衛者青首也鄒費邾邳者羅鷺也外其餘  
則不足射者見鳥六雙以王何取王何不以聖人爲  
弓勇士爲繳時張而射之此六雙者可得而囊載也

楚人以弋  
說項襄王

### 諷諫得嗣

魏文侯有子曰擊次日曰訢訢少而立之以爲嗣封擊  
中山三年莫往來其傳趙倉唐諫曰何不遣使乎則  
臣請使擊曰諾於是遂求北犬晨鴈齋行倉唐至曰  
北藩中山之君再拜獻之文侯曰嘻擊知吾好北犬  
者晨鴈也卽見使者文侯曰中山之君亦何好乎對  
曰好詩文侯曰於詩何如曰好晨風文侯曰晨風謂  
何對曰詩曰鴝彼晨風鬱彼北林未見君子憂心欽  
欽如何如何忘我實多於是文侯大悅曰欲知其君  
視其所使中山君不賢惡能得賢傳遂廢太子訢召

中山君以爲嗣

韓詩外傳

### 蔓支忠諫

庾信哀江南賦章蔓支以轂走宮之奇以族行呂氏  
春秋中山之國有夙繇者智伯欲攻之鑄大鍾方車  
二軌以遺之夙繇之君將迎鍾赤章蔓支諫不用斷  
轂而行至衛七日而夙繇亡

文苑英華作蔓支文藝  
文類聚作蔓支皆誤

### 諫伐邯鄲

魏王欲攻邯鄲季梁聞之中道而反衣焦不伸頭塵  
不浴往見王曰今者臣來見人於大行乃北面而持

其駕告臣曰吾馬良吾用多吾御善此愈善而逾遠  
耳今王動欲成霸王而攻邯鄲動逾數而離王逾遠  
耳猶至楚而北行也

戰國策

### 秦璽

周恭叔跋秦璽文曰嗚呼斯乎是嘗去詩書以愚百  
姓者乎是嘗聽趙高以立胡亥者乎是嘗殺公子扶  
蘇與蒙恬者乎是嘗教其君嚴督責而安恣睢者乎  
使其璽不得傳者斯人也而其刻畫吾忍觀之哉李  
微之曰秦璽者李斯之魚蟲篆也其圍四寸至漢謂

之傳國璽迄於獻帝所寶用者秦璽也歷代皆用其  
名永嘉之亂没于劉石永和之世復歸江左者晉璽  
也太元之末得自西燕更涉六朝至于隋代者慕容  
燕璽也隋謂之神璽劉裕北伐得之關中歷晉暨陳復為  
隋有者姚秦璽也開運之亂没于耶律女真獲之以  
為大寶者石晉璽也蓋在當時皆誤以為秦璽而秦  
璽之亡則已久矣

### 寶典籍

周之大寶鎮河圖大訓列焉易象在魯三墳五典在

楚周不能有其寶矣然而老聃之禮甚弘之樂文獻  
猶存及王子朝以典籍奔楚於是觀射父倚相皆誦  
古訓以華其國以得典籍故也區區一鼎與懷璧同  
其能國乎

### 明經術

魏相以易相漢能上陰陽之奏而不能防戚患之萌  
不知繫于金柅之戒也匡衡以詩相漢能陳關雎之  
義而不能止衽寺之惡不知昏椽靡兵之戒也經術  
雖明奚益焉

### 星應

史墨曰越得歲而吳伐之必受其凶杜牧注孫子曰  
歲爲善星不福無道火爲罰星不罰有德嘉定中日  
官言五福大一臨吳分真文忠公奏漢之肇造以寬  
仁得民而不在五星之聚并晉之郤敵以將相有人  
而不在歲星之臨吳

### 蜚征

四代篇引詩云東有開明

避景帝諱

于時雞三號以興庶

虞庶虞動蜚征作裔民執功百草咸淳

庶虞蓋山虞澤虞之屬馬

融廣成頌  
用飛征

### 貢物

書大傳載四海河江五湖鉅野鉅定濟中孟諸隆谷  
大都之貢物此禹時也周書載伊尹爲四方獻令此  
湯時也王會載八方會同各以其職來獻自稷慎以  
下其贄物二十一自義渠以下其贄物二十自高夷  
以下其贄物十四自權扶以下其贄物九此成王

時也

### 止苞苴

真文忠公奏疏曰乾道淳熙間有位于朝者以饋遺  
及門爲恥受任于外者以苞苴入都爲羞宋文公封  
事言風俗之弊甚者以金珠爲脯醢以契券爲詩文  
其垂炯戒深乎

### 謝邈削詔

謝邈傳孝武多賜侍臣文詩辭義有不雅者邈輒焚  
毀之通鑑云帝好爲手詔詩章以錫侍臣或文詞率  
爾徐邈應時收歛還省刊削皆使可觀經帝重覽然  
後出之謝邈誤徐邈

### 晉有功

焚石勒之幣江左君臣之志壯矣僭號之國十六而

晉敗其一

符堅滅其三李勢慕容超姚泓

不可以清譚議晉

孟侯

大傅太子年十八曰孟侯於四方諸侯來朝迎於郊者問其所不知唐冊太子文云盡謙恭於齒胃審方俗於迎郊

奸孽禍

康節邵子西晉吟有刀難剖公間腹無木可梟元海頭禍在夕陽亭一句上東門嘯浪悠悠攻之晉史賈充納女以壬辰劉曜陷長安以丙子相去纔四十五年姦臣孽女之敗國家可畏哉近世賈妃之冊以壬辰而宋之禍亦以丙子悲夫

鄉黨清議

韓信無行不得推擇爲吏陳湯無節不爲州里所稱主父偃學縱橫諸儒排擯不容李陵降匈奴隴西士大夫以爲愧秦漢之後鄉黨清議猶嚴也是以禮官勸學則曰崇鄉里之化

風俗厚

曲禮少儀之教廢幼不肯事長不肯事賢東都  
之季風化何其美也魏昭請於郭泰願在左右供給  
灑掃荀爽謁李膺因爲其御范滂之歸鄉人殷陶黃  
穆侍衛於旁應對賓客闕里氣象不過是矣

### 秦漢窮侈

始皇初并天下咸陽之間北自九嶷南至樗社闊四  
百里東自河西及汧渭長八百餘里離宮別館相望  
聯落宮城前闕以磁石甃門凡外國使來有懷刃者  
自止不能行以示神異又漢武作鳳凰闕至高七十  
丈五尺此等皆極奢極過極恠之爲也

### 秦俗

秦人家富子壯則出分家貧子壯則出贅借父耰鉏  
慮有德色毋取箕箒立而誚語挽哺其子與公併倨  
媢姑不相說則反脣而相稽

### 齊俗侈

志謂齊俗彌侈織作冰紈綺繡純麗之物號爲冠帶  
衣履天下臨淄有服官說苑墨子曰錦繡絺紵亂君  
之所造其本皆興於齊景公喜奢而忘儉幸有晏子

以儉鑄之然猶幾不能勝齊俗之侈蓋自景公始

### 朱博變俗

朱博字子元社陵人遷瑯琊太守齊郡舒緩勅工曹官屬多衰衣大裙不中節度自今掾吏禮節皆如楚趙

漢書

### 封建節行

一梁以折七國之鋒一琅琊以續典午之緒封建可以支變故安平之功以畫邑之王蠋南陽之興以東郡之翟義節行可以回人心

### 節義

伐吳之役利獲二俊張華之稱陸機雲也平齊之利唯在於爾周高祖之諭李德林也機雲於河橋之役與王師爲敵其不忠大矣德林願以死奉楊堅復以所事齊者事周矣二國何利焉是以持國必崇名節持身必守行誼

### 寡女節婦

楊堅以后父篡國亦一莽也以不仁得之以不仁守之必及其世堅之謂矣莽堅之女皆節婦也爲其父



者亦少愧哉

### 風聲

衛石碣以義厲一國而甯遠之類萃焉晉趙衰以遜化一國而知范之賢繼焉故曰樹之風聲

### 事神爲民

聖王先成民而後致力于神故奉牲以告曰博碩肥韜謂民力之普存也謂其畜之碩大蕃滋也謂其不疾疫蠹也謂其備脂咸有也奉盛以告曰潔粢豐盛謂其三時不害而民和年豐也奉酒醴以告曰嘉粟

旨酒謂其上下皆有嘉德而無違心也

季梁勸脩政

### 勿開棘路

宋之貶蔡確也范純仁曰勿開棘路恐自不免邵伯溫曰此存國體仁人之用心也先王之典姦宄者誅亂常者辟假令后世襲純仁之知而掩賊保奸亂臣賊子將橫于天下矣

### 驅奸

龜山楊氏進以蔡京入卽發其奸猶可抹亂逮其貶而後劾之敵已在門詩曰啜其泣矣何嗟及矣龜山

之謂乎荀爽爲卓所劫而出附和羣正密謀誅卓事雖不逮志可則也龜山論貶安石徒摘其誤經之疵是舍其盜穀而責其蹊田者與

### 功臣流禍

晉之篡魏以賈充其亡亦以充隋之平陳以楊素其亡亦以素立太子妃易太子亡之兆也玄感之于素猶李敬業之于勣也煬武之立素勣之力也其子欲撲其燎可乎

### 五屬國

武紀元狩二年秋匈奴昆邪王降置五屬國以處之

注不載五屬國之名表云三年攻地理志屬國都尉安定

治三水上郡治龜茲天水治勇士五原治蒲澤張掖

治日勒此武帝初置也若金城西河北地屬國置于

宣帝時不在五屬國之數

### 山塔勞民

炆王假山成請宮僚觀之姚坦熟視曰此血山耳開寶塔成田錫上疏曰衆以爲金碧煒煌臣以爲塗膏釁血

### 西湖長

東坡守杭守穎皆有西湖故穎川謝表云入參兩禁  
每玷北扉之榮出典二州輒爲西湖之長秦少章云  
十里薰風苗蔕初我所至有西湖欲將公事湖中  
了見說官閑事亦無後謫惠州亦有西湖楊誠齋詩  
三處西湖一色秋錢塘汝穎及羅浮東坡元是西湖  
長不到羅浮便得休

### 倉唐尊君

說苑魏文侯封子擊中山倉唐奉使文侯顧指左右  
曰子之君長孰與是倉唐曰擬人必與其倫諸侯無  
偶無所擬之曰長大孰與寡人倉唐曰君賜之外府  
之裘則能勝之賜之斥帶則不更其造

### 虎跌蹠

魏魁謂建信君曰人有置繫蹄者而得虎虎怒跌蹠  
而去虎之情非不愛其蹠也然而不以徑寸之蹠害  
七尺之軀者權也今國家者非直七尺之軀也而君  
之身於王非環寸之蹠也願君早圖之

戰國策

### 任棠設喻

龐參拜漢陽太守郡民任棠者有奇節參到先侯之

棠不與言但以難一本水一杯置戶屏前自抱孫兒  
伏于戶下參思其微意良久曰棠是欲曉太守也水  
者欲吾清也拔大難欲擊強宗也抱兒當戶欲吾開  
門恤孤也於是歎息而還

### 三閭忠楚

王逸云屈原爲三閭大夫三閭之職掌王族三姓曰  
昭屈景屈原序其譜屬率其賢良以厲國士漢興徙  
楚昭屈景於長陵以強幹弱支則三姓至漢初猶盛  
也莊子曰昭景也著戴也甲氏也著封也非一也說

云昭景甲三者皆楚同宗也甲氏其卽屈氏歟秦欲  
與楚懷王會武關昭睢屈平皆諫王無行襄王自齊  
歸齊求東地五百里昭常請守之景鯉請西索救於  
秦東地復全三閭之賢者忠於宗國所以長久

### 梁癖佛禍

東魏檄梁曰毒螫滿懷妄敦戒業躁競盈胸謬治清  
淨可謂切中其膏肓矣誠齋詩云梵王豈是無甘露  
不爲君王致蜜來曾景建云此身已屬侯丞相誰辦  
金錢贖帝歸

子路飯長溝

韓非曰季孫相魯子路爲郈令魯以五月起衆爲長溝子路以其私秩粟爲拯飯要作溝者於五父之衢而食之孔子聞之使子貢往覆其飯擊毀其器曰魯君有民子奚爲乃食之言未卒而季孫使者至讓曰肥也起民而使之先生使弟子令徒役而食之將奪肥之民耶孔子駕而去魯

蘇張受術

尹知章序鬼谷子曰蘇張儀往事之受押闔之術

十有二章復受轉丸祛篋三章然蘇儀用之裁得溫言酒食貨財之賜秦也儀也知道未足行復往見其言所受于師行之少有口吻之驗耳未有傾河填海移山之力豈可更聞至要使弟子深見其闡奧乎先生曰爲子陳言至道齋戒擇日而往見先生乃正席而坐嚴顏而言告二子以全身之道文心雕龍云轉丸騁其巧辭飛鉗伏其精術

程子曰秦儀學於鬼谷其術先揣摩然後押闔

既動然後用鉤鉗

弭盜驅鼠

句容有盜改置社稷而盜止下邳多盜遷社稷於南山之上盜亦衰息見陳後山談叢岳州田鼠害稼雍明遠曰迎貓之祭不脩也命祭之鼠隨以斃見范蜀公集

### 蜀盜源

宋蜀道寇作臨汝侯嘲羅研曰卿蜀人何樂禍如此研曰蜀中百家爲村有食者不過數家貧迫之人十常八九束縛之吏十有三各令有五母鷄二母彘牀上有百錢甌中有數升麥飯雖蘇張巧說于前韓白接劍于後將不能一夫爲盜誠哉是言使百姓知有生之樂豈能蹈死亡之禍哉

### 法律

律章句馬鄭諸儒十有餘家魏明帝詔但用鄭氏章句范蜀公曰律之例有八以准皆各其及卽若若春秋之凡宋莒公曰應從而違堪供而闕此六經之亞文也

昔人謂律是八分書蓋其條目莫非防範人欲扶翼天理也

### 肺石

長安故宮闕前有唐肺石尚在其制如佛寺所繫響

石而甚大可長八九尺形如人肺亦有欵志但漫剥不可讀秋官大司寇以肺石達窮民原其義乃伸冤者擊之立其下就士師聽詞如今之槌登聞鼓也所以肺形者便于垂又肺主聲聲所以達其冤也

### 立法峭

韓丁曰董闕于爲趙上地守行石邑山中深澗峭如膚深百仞問其左右人曰嘗有人入此者乎對曰無有嬰兒盲聾狂悖有入此者乎對曰無有牛馬犬豕嘗有入此者乎對曰無有董闕于喟然太息曰吾能治矣使吾法猶入澗之必死則民莫敢犯何爲不治

### 梧桐辨囚

李子長爲政欲知囚情以梧桐爲人象囚之形鑿地爲埴以盧爲槲臥木囚其中囚罪正則木囚不動囚冤侵奪木囚動出不知囚之精神着木人乎將精神之氣動木人也

論衡亂龍

### 外國乞文

梁使臣至吐谷渾見牀頭數卷乃劉孝標集大曆中秋羅國上書請以蕭夫子穎爲師元和中雞林賈人

鬻元白詩云東國宰相以百金易一篇偽者輒能辨  
元豐中契丹使人俱能誦蘇子瞻文洪武中日本安  
南俱上章以金幣乞宋景濂碑文嘉靖初朝鮮上言  
願頒示關西呂某文以爲式所謂一解不如一解  
長倩忠唐

岑長倩於武曩之革命請賜皇嗣姓武氏及武三思  
求爲太子則止之謂已立皇嗣矣遂被誅長倩用忠  
而就其勢存唐社稷其忠殆過於陳平之封諸呂  
伍子胥

伍子胥橐載而出昭關夜行晝伏至於粟水無以糊  
其口膝行蒲伏稽首肉袒鼓腹吹箎乞食于吳市卒  
興吳國

### 二王忠孝

瑯琊王陽爲益州刺史行部至邛夔九折阪歎曰奉  
先人遺體柰何數乘此險以病去及王遵爲刺史至  
其阪問吏曰此非王陽所畏道耶吏對曰是遵叱其  
馭曰驅之王陽爲孝子王遵爲忠臣

漢書

### 三窟



齊人馮諼者貧乏不能自存使人屬孟嘗君願寄食門下孟嘗君使收債于薛諼矯命以債賜諸人燒其券曰爲君市義後有毀孟嘗君於湣王孟嘗君就國未至百里老幼迎於道中孟嘗君顧諼曰先生爲文市義乃今見矣諼曰狡兔有三窟乃免其死今君有一未得高枕而臥也請爲君復鑿二窟孟嘗乃與車五十乘金五百斤西遊于梁梁惠王聘孟嘗君齊王聞之君臣恐懼使大傅謝曰願君顧先生之宗廟姑反國統民馮諼謂孟嘗君請先生之祭器立宗廟於薛廟成謂曰三窟已就請君高枕無樂矣

### 起泣西河

吳起治西河王錯譖之魏武侯武侯使人召吳起至岸門上車而立望西泣數下其僕曰竊觀公之志視天下若舍履今去西河而泣何也吳起雪泣應之曰子弗識也君誠知我而使我畢能秦必亡西河今君聽讒人之議不知我西河之爲秦不久矣起入荆西

河果入秦

呂氏春秋

### 沈猶易詐

孔子爲大司寇初魯之販羊者洸猶氏常朝飲其羊  
以詐市人及孔子之爲政則流猶氏不敢朝飲其羊

衛士

范蠡其始居楚之越越王與言盡日大夫石賈進曰  
衛女不貞衛士不信客應諸侯渡河津無因自致殆  
不貞士也 越絕

張浚

宋張浚其晉殷浩唐瑄乎高談可聽實用不副天性  
刻忌讎李綱趙鼎宗澤岳飛而薦秦檜信呂社不采  
善謀而致三敗世有英主當辟失律文公之狀似爲  
庇護噫大賢牽於朋好宋事可盡信乎

徐洪客

程篁墩論董公遇漢高祖用其策以成漢業徐洪客  
遇李密不能用其言而不能成事似矣而非也李密  
起于羣盜隋政雖失而天下尚屬其有雖欲數其罪  
而討之其誰信從况密嘗移檄數煬帝之罪矣而人  
不與也及考李密本傳徐洪客上書勸密因士氣超  
江都挾帝以令天下亦無執取獨夫之說執取獨夫

必有武王之德八百諸侯從之而后可故愚以爲雖用洪容之言亦不能成事矣

卽墨多君子

齊威王封卽墨大夫燕取齊七十餘城唯莒卽墨不下田單以卽墨破燕齊王建將入秦卽墨大夫入見畫臨晉武關之策建不聽而亡吁何卽墨之多君子也建能聽卽墨大夫之謀則齊可以勝秦矣國未嘗無士也

文多出楚

艾軒謂詩之萌芽自楚人發之故云江漢之域詩一變而爲楚詞屈原爲之唱是文章鼓吹多出於楚也

秦饗重耳

秦伯將饗公子如饗國君之禮使子餘公子賦黍苗子餘曰重耳之仰君也如黍苗之仰陰雨也若君實能庇蔭膏澤之使能成嘉穀薦在宗廟君之力也

國語

援兵

楚將伐齊齊王使淳于髡求救于趙齊金百斤車馬十駟髡曰臣之鄰人祠田以一簋飯與一鮒魚祝曰

下田洿邪得穀百車臣笑其所祠者少所祈者多王  
乃益齋黃金白璧車馬百駟

### 鴈君鴈臣

元魏初居雲中孝文變左衽之俗遷都洛陽羣臣畏  
暑不欲其內徙下令北方酋長侍子聽其冬朝春還  
部落時人謂之鴈臣予以元世諸君每歲避暑上都  
秋還大都可謂鴈君近時北虜每年一寇山西亦可  
謂鴈虜

### 絃不可記

趙遣使于楚臨去楚王方鼓琴使者因詭曰大王鼓  
琴未有如今日之悲也請記其處王曰不可夫時有  
燥濕絃有緩急徽柱推移不可記也使者曰臣愚請  
借此以譬之楚之去趙二千餘里變改萬端亦猶絃  
不可記也

韓詩外傳

### 審音

隋之在朝者溺于淫放萬寶常處恬而心正一聞其  
聲而知其亂也元之滅久矣中原化爲夷者未之能  
革俗樂其尤者瑟琴合奏自遠憑高聽之若胡羯之

相語然舞則顯作胡狀矣

### 絕纓報楚

楚莊賜羣臣酒日暮華燭滅有引王美人衣美人乃挽絕冠纓告王曰知之王曰賜人酒醉欲顯婦人之節吾不取也乃命左右勿上火與寡人飲不絕纓者不權也羣臣纓皆絕盡權而去後與晉戰有人常力戰斬首以退問之乃昔絕纓者

說苑

### 壺食得士

楚王伐中山中山君亡有二人荷戈而從之中山君顧二人曰子何爲者對曰昔臣之父嘗餓且死君捨食以脯臣父臣之父且死曰中山君有事汝必赴之是以今來死君之難中山君曰以一杯羹而亡國以一食而獲二死士

戰國策

### 趙襄處原

趙襄以壺飧從徑餒而弗食故使處原韓非子曰晉文公出亡箕鄭挈壺飧而從迷而失道與公相失餓而不敢食及文公反國曰輕忍饑餒之患而必全壺餐是將不以原叛乃舉以爲原令

曹沫再將成功

曹沫者魯人也以勇力事魯莊公為魯將與齊戰三  
敗魯莊公懼乃獻遂邑以和復以為將齊桓公與魯  
會于柯而盟曹沫執匕首劫齊桓公桓公盡還魯

地侵

兵無定法

李晟每戰必錦裘繡帽自表而晟以勝宋殷孝祖每  
戰常以鼓蓋自隨而孝祖以敗兵豈有定法哉

堂堂陣

黃帝出軍訣曰始立牙之日吉氣未應旌旛指敵或

從風而來金鐸之聲揚以清鼓鞀之聲婉而鴻是謂  
堂堂之陣

將不受命

趙使樂乘代廉頗頗怒攻樂乘使趙蔥顏聚代李牧  
牧不受命此非為將之法頗牧特戰國之將爾易之  
師曰行險而順

將治心

為將之道當先治心太山崩于前而色不變糜鹿興  
于左而目不瞬然後可以制利害可以待敵

蘇老泉論將

將自用

楚莫敖狃于蒲騷之役將自用也諸葛恪東關之勝亦以此敗其失在于自用

兵用奇伏

劉淠反攻大梁田祿伯請以五萬人別循江淮收淮南長沙以與淠會武關岑鼓攻公孫述自江州泝都江破侯丹兵徑拔武陽繞出延岑軍後疾以精騎赴廣都距成都數十里李愬攻蔡蔡悉精卒以抗李光顏而不備愬自文成破張柴疾馳二百里夜半

到蔡黎明擒元濟此奇道也漢武攻南越唐蒙請發夜郎兵浮舡牂牁江道番禺城下以出越人不意鄧艾攻蜀自陰平由景谷板木緣磴魚貫而進至油江而降馬邈至綿竹而斬諸葛瞻遂降劉禪田令攻守潼關關之左有谷曰禁而不之備林言尚讓人之夾攻關而關兵潰此伏道也

武臣不受中間

重臣爲間于中雖大知不能成績是故有孝友張仲然後有文武吉甫有魏相識兵略然後有充國就屯

田范公知人料事兩失之矣

兵術

李牧守邊每匈奴入寇輒入保不戰如此數歲一旦出兵大破匈奴威震漠北此正老子所謂大國以下小國則取小國小國以下大國則取大國又曰欲上民必以言下之欲先民必以身後之孫子云始如處女敵人開戶後如脫兔敵不及拒古人用兵之術大率類此

車戰

朱文公曰讀曹公杜牧孫子見其所論車乘人數諸儒皆所謂言唯蔡季通每論此事以考周禮軍制皆合愚按孫子作戰篇凡用兵之法馳車千駟革車千乘帶甲十萬曹公注馳車輕車也杜牧注輕車戰車也古者車戰革車輜車重車也載器械財帛衣裝司馬法曰一車甲士三人步卒七十二人炊家子十人固守衣裝五人廐養五人樵汲五人輕車七十五人重車二十五人故二乘兼一百人爲一隊舉十萬之衆革車千乘校其費用支計則百萬之衆皆可知也